

TENTAMEN MEDICUM
INAUGURALE
DE

DYSPEPSIA:

QUOD,
ANNUENTE SUMMO NUMINE,

Ex Auctoritate Reverendi admodum Viri,

GULIELMI ROBERTSON, SS.T.P.
ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,
Et nobilissimæ FACULTATIS MEDICÆ decreto;

PRO GRADU DOCTORIS,
SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS;
Eruditorum examini subjicit

CAROLUS NEWMAN,
HIBERNUS.

Societ. Med. Phys. Edin. Sod. Hon.

Sincerum est nisi vas, quodcunque infundis, acefcit. HOR.

Ad Id. Septemb. hora locoque solitis.

EDINBURGI:

Apud BALFOUR et SMELLIE,
Academiae Typographos.

M, DCC, LXXIII.



317695

Viro ornatissimo,

JOHANNI LONGFIELD, M. D.

Artem Apollineam,

Maxima sibi cum laude,

Summoque generis humani commodo,

Apud Corcagienfes exercenti,

S. P. D.

CAROLUS NEWMAN.

CUM hujusmodi tentamina juvenilia Viri
cujusdam illustris tutelae subjicere invaluit
consuetudo, Cui prius hocce, quaecunque sit,
consecrarem, quam Illi, cujus equidem consilio,
me hasce invisisse terras, et multa in hacce
florantissima Academia hausisse beneficia, prae-
cipue debeo? Virtutes revera tuas, omnibus
notas, dinumerare, cum modestia tua, tum me-
um conatui impar ingenium, prohibent. Ac-
cipias haec, Vir dignissime, Te quamvis, ex
calami juvenilis incuria, minus digna Patro-
no, parvum existimationis testimonium, precor.

Vive valeque.

For
M^r. Ledgerwood
from his humb. serv^t.
The Author

D E

D Y S P E P S I A.

P R O O E M I U M.

VENTRICULUS, omne peregrinum recipiens, et hinc primam juris civitatis humanae notam imprimens, tam magna sensibilitate praeditus, singularibusque dotibus instructus est, ut non mirum equidem videatur, stomachum totius corporis regem veteribus salutari.

Hujus enim validus firmat tenor omnia membra,
Et contra ejusdem infirmantur cuncta dolore.

Est autem sympathia haec in praxi frequentissima; immo partes a ventriculo maxime remotae, quibus nullum cum eo intercedere videtur commercium, afflictae, motus functionesque ejus mirifice perturbant. Exempli equidem permulta hujus ventriculi consensus facile adduci queant; sed ita lucide ante oculos ponit quotidiana experientia, ut nemo, nisi omnino caecutiens, eum non videat. Clarissime sic, in medicina facienda, apparet necessitas

A

animum

animum sedulo ad ventriculi affectiones advertendi. Nulla vero frequentior occurrit, nec curatu difficilior, hacce de qua, aliquid per almae hujus academiae leges in lucem proferrem coactus, pauca subjicere volo.

D E F I N I T I O.

Ventriculi functio idiopathice turbata, per Anorexiam, Nauseam, Vomitus, Inflationem, Ructum, Ruminationem, Cardialgiam, Gastrodyniam, et Alvum plerumque restrictam, indicata.

H I S T O R I A M O R B I.

Tam mirum intercedere videtur commercium, ventriculum inter aliasque corporis humani partes, ut omnia in hocce morbo occurrentia symptomata enarrandi difficultas facillime appareat. Praecipua vero sunt; repletionis et ponderis circa ventriculum sensus, cum obtuso sive gravativo praecordiorum dolore, post pastum recrudescente. Interdum tormina vehementesque ventriculi et intestinorum dolores; saepius vero murmura et borborygmi; et licet, per flatum sursum vel deorsum expulsionem, levamen percipiat aeger, ex eorundem tamen proventu rursus opprimitur. Nausea, cum inani ad vomendum conatu, vel etiam ingestis crudi ipsa vomitio, vel materiae biliosae et pituitosae quandoque.

quandoque viridis rejectio; frequentius vero acidae, et aliquando tam acris, ut dentes stupefacere et fauces excoriare valeat. Appetitus plerumque languet, et etiam cibi averfatio obtinet; sed interdum auctior evadit. Ructus varii saporis, plerumque acidi, adsunt; crassioris tenacisque materiae frequens scretus. Sapor in ore fastidiosus; et lingua sorditie alba vel lutea obducta, cum siti circa horas matutinas, juncta saepe tussi molesta. Acris et inflammabilis materiae post cibum eructatio. Sunt quoque qui, una vel altera a pastu hora, placide ingesta ex ventriculo ad os usque rejiciunt, et lobatim exspuunt aliquali cum masticatione; immo qui iterum ea deglutiunt, ut boves et caprae; unde merito ruminare dicuntur: Et hoc lautiores post dapes praecipue accidit. Alvus quibusdam soluta, plerisque pertinaciter astricta. Cardialgia, vel molesta quaedam sensatio, de qua valde queritur aeger, magna cum anxietate, inquietudine, et spirandi angustia. Cordis palpitatio. In jejuno capitis dolor, praecipue tempore matutino, et vertigo. Faciem modo rubor modo pallor occupat, et post prandium maculis rubentibus plerumque suffunditur. Pulsus debilis, parvus, et tardus, nonnunquam intermittens. Animi dejectio, et tanta systematis mobilitas, ut a levissimis causis maxime perturbetur. Vigiliae non raro pertinaces, vel somnus incubo et insomniis plurimum turbatus. Praeterea languor totum corpus occupat, extremas partes algescunt, sensimque emaciatur patiens.

M O R B I

M O R B I T H E O R I A.

Nulla apud medicos plus invaluit opinio, quam quae omnia dyspepsiae symptomata ex saburra aliquali, seu cruditatibus in ventriculo latitantibus, oriri ponit. Nihil vero saepius in errore fuisse creditum, quam mucosae salinae viscidaeque materiae multitudo; praecipue, quia hujusce magnam quantitatem plerumque videmus per vomitionem ex stomacho rejectam. Ratiocinatio tamen non omnino verisimilis videtur. Etenim, omnibus in re medica minimum versatis bene notum, ventriculi tunicam internam sive villosam undique folliculis confertim spargi, a natura sine dubio constitutis, ut mucum, ad officia quaedam in oeconomia animali obcunda utilissimum, fecernerent. Quantitas revera ab hisce secreta non parva; ut plane apparet ab illustrissimi Senac experimento, ad probandum relato, mucum in massa sanguinis communi propria forma existere; et non in folliculis penitus generari. Ventriculo enim bene deterso, margineque regulae eburneolae raso, tam prodigiosam muci quantitatem expressit, ut, in ejus lentitia, nequaquam in folliculis contineri potuerit; sed ex vasis secretoriis, etiamque sanguineis ipsis, derivari oporteat. In praesentiarum, hujusce opinionis fallaciam evincere non conabimur; tametsi mucum, in sanguine, dissimili sub statu, adesse, exindeque humoris tenuissimi forma secerni, demonstrare non valde difficile foret. Ex hoc tamen evidenter apparet, mucum, magna in quantitate folliculis seu vasis secretoriis, reponi; quibus per vomitus

mitus operationem fortiter compressis, valdeque agitat-
tis, partem in ventriculi cavitatem effundi, adeoque
aliis cum stomachi contentis rejici, necesse est. At ex
eo, mucum in ventriculi cavitate antea innatare, non
tamen colligere oportet; folliculi enim facile omnem
continrent. Haud equidem inficias ibimus, mucum
folliculis effusum, interdum, ventriculi propter imbecil-
litatem, ingestis non satis dispertiri vel commisceri
posse, sic ut portio in ventriculo remaneat; et propter-
ea applicationi stimulorum, qui, ad ventriculi actio-
nem promovendam, appetitumque excitandum, summe
necessarii sunt, obviam eundo; simulatque medicamen-
torum operationem aliquatenus praevertendo, ad mor-
bum adaugendum seu protrahendum symbolam suam
conferat. Nobis vero haudquaquam credendum est,
omnia dyspepsiae symptomata ad hancce causam rele-
ganda: Praefertim, ut nunc satis compertum est,
compluribus, quorum ventriculi hacce materia a-
bundare videbantur; emetica (quae, ut saepe aevi
perbrevis auxilium praebent, frequenter iterata sunt)
ter quaterve singulis hebdomadis adhibita fuisse, muci
tamen tantundem postremo rejectum ac post primam
emetici exhibitionem.

Nunc quoque consideranda venit stomachi altera im-
puritas, materiae biliosae quantitas in ventriculo hospi-
tantis; hujusce frequenter, nec non multorum aliorum
morborum, pater plurimis nuncupata; aequo ac mucus
cenfeo jure. Non equidem dubitandum, in ventriculo
intestinatorumque tractu, non solum motum peristalti-
cum deorsum obtinere, sed etiam saepe saepius motum,
prorsus

prorsus ex adverfo, seu inferne sursum occurrere, ab ullo, ad canalis alimentarii contentorum exitum, impedimento adaugendum. Hoc igitur in duodeno, quo ductus communis cholidochus infertus, specialiter accidente, in ventriculum bilem saepenumero regredi, necesse est; et illic non raro adeste, bene notum; nullo tamen detrimento systemati exinde oriente. Sin autem bilis, ventriculo, ingenti copia, simulque vitiata, infundatur; tunc equidem, ventriculi functiones perturbando, effectus systemati noxios inferre queat. Maxime vero cavendum, ne, ex materiae biliosae vel aeruginosae per vomitionem rejectione, res magna ex parte sic se habere credamus. Per hancce enim actionem, motus peristaltici inversionem magnopere augeri, ductusque biliarios, et omnia alia excretoria, in superiori intestinorum parte dehiscencia, emulgeri, patet. Et bilem, nisi exhibitione emetici fortioris, ex quo aeger saepe vomuerat, rarissimam apparere; et tunc ad finem solummodo operationis nonne plerumque invenitur?

Ex hisce, mea opinione, non perceptu difficillimum, quanta ambiguitate illa prematur theoria, quae ex saburra seu cacochyliis, sic frequenter dicta, hosce affectus connasci vult. Haec enim, quando eveniat, aequo ac cae praesymptomata jure, ad aliam in systemate ante existentem causam ascribenda, quam in ventriculi imbecillitate seu atonia ponendam, valde probabile existimamus. Nunc vero hancce opinionem, symptomatum ex consideratione, causarumque remotarum operatione, stabilire nobis conandum.

Omnium

Omnia tamen, quae in hocce morbo occurrere possunt, symptomatum enucleationem, nec viribus nostris tenuibus, nec dissertationis hujusce limitibus, moliri convenit. Symptomata ergo praecipua tantum, magisve essentialia, quae in definitione antea tradita, hic considerare, jamjam in votis est.

Imprimis, De ANOREXIA. Ante veroquam de hocce aliquid proponere incipiam, summe necessarium videtur, causam cibi appetentiae consuetae naturalisque exquirere. De hac maxime apud medicos hodieque disceptatum; sed, omni de eorum sententiis disputatione omissa, nobis notandum venit, quod, in omni oeconomiae humanae functione, facile recognoscamus, omnes ejus actiones ad finem aliquem propositum implendum dirigi; quamvis, aliquando minus apposite accommodatas esse, appareat. Exinde, quin crederem appetitus naturalis conditionem, statu cum systematis generali, quoad plenitudinem et depletionem, maximum habere nexum, non facile equidem est. Nunc cum praecipua corporis evacuatio sit perspiratio, appetitus huic maxime conveniat necesse est; et quod systematis depletionem quamlibet, in fibris vasorum extremorum cuticularium, contractio sequatur aucta patet; quae cum actione ventriculi fibrarum muscularium fortiore proxime connectitur. Ex hac igitur non rite sustentata oritur illa molesta sensatio, cui appetitus plerumque innititur. Haec si ita sint, ut multis ex rationibus verisimillimum videtur; illico et inferendum, ex debilitate

litate debiliorique ventriculi fibrarum motricium actione, ortum ducere anorexiam. Hoc vero, ex causarum, quas hanc atoniam inducere compertum est, consideratione, multo magis stabiliturus sum.

NAUSEAM, prout anorexiae majorem tantum gradum, considerare licet. Ex inappetentia igitur ad cibi aversionem progredimur; paulo ulteriusque hac procedente, vomitio ipsa accidit. Si haec vero extrema enodare possem, nausea exinde haud dubie facilis intellectu fiet.

Ad VOMITUS explicationem nunc accingamur. Pathologicis plerisque omnibus, ex alicujus ventriculum directe stimulantis materiae, indeque contractionem ejus excitantis applicatione, vomitum provenire creditum. Sed bene nunc notum, “ non solum impulsio- nem, aliasque, quas motum producere putemus, causas idcirco in oeconomia animali motus excitare; sed multas alias causas, etiam quae motum potius diminuere videantur, in systemate tamen humano motum adaugere. Sic multa animi pathemata quae motum primo diminuunt, nonnullae ex debilitate officioque suo fungendi difficultate ortae propensiones, impressorum consuetorum absentia, evacuationes, aliaeque systematis relaxationis causae, frigus, potentiaeque narcoticae, omnes motibus, in oeconomia animali notatu dignissimis, occasionem praebent.”

Ad hoc, in vomitus casu, probandum, quem ab aegritudinis tantum perceptione, cui occasionem dedit debilior ventriculi actio, saepe saepius cieri, censeo:
quotidiana

quotidiana non defunt exempla, ubi ex sanguinis haud magna quantitate brachio extracti, in positura corporis erecta, animi inducitur deliquium; cui plerumque ventriculi aegritudo et vomitus sese comites adiungunt. In hoc exemplo, stimuli cujusvis ne minima quidem suspicio existere potest; facile enim vomitum evitare possumus, debilitatem, ex cerebri tensionis tam subitanea imminutione orientem, per positionem horizontalem, praeveniendo. Similis quoque operationis multae sunt aliae causae, quae in ventriculum magis immediate agunt. Sic multa in stomachum ingesta vomitionem provocant, etsi nullius vis stimulatricis, ne minima quidem ex parte, suspecta habenda; velut aqua tepida; quae in usu est omni populo. Quanquam enim ventriculi distentio, pylorique contractio inde proveniens, symbolam suam conferant, attamen aqua tepida, in parva etiam quantitate, nonne potus nauseosissimus? Hoc vero praecipue accidet, si cum oleo blandissimo sit commista; nam, ad linguam tantum ipsam sic applicata, saepe vomitum ciebit. Ad probandum quoque, vomitionem ventriculi debilitate saepissime excitari, observatu dignum est, sedantia opium e. g. frequenter vomitum movere. Unde quidam afferuerunt, hominem magnis opii dosibus, vix tandem se de medio tollere posse; nisi enim affectio quaedam spasmodica, quae opium magna in quantitate ferre potest, simul adsit, per vomitionem plerumque rejicitur; nec hominum exempla, quos spes sic fefellit, defunt. Ab opii effectibus stimulantibus, aliquid e contra objici potest; et forsan non injuria. Operatio vero propria

B

seu

seu peculiaris tantum est sedativa. Multis quoque hominibus, in quibus debilitatis magnae clarissima apparuerunt indicia, nihil pervulgatius, quam ad vomitum blandissimis liquoribus moverentur; acris stimulantibusque tamen, sine ullo hujuscemodi effectu, sed omnino contrario propinatis, ut ab illustrissimo Van Swietenio observatur: “ In illis qui ardentibus spiritibus abutantur quotidie; miseris enim his adeo saepe languet et friget ventriculus, ut, nisi spirituosis his stimuletur, perpetuam nauseam et vomitum pituitae tenacis faciat: Unde coguntur vel inviti in similium usu pergere.” Ex hoc tamen non nobis est concludendum, emetica non saepenumero, vim propter stimulantem, agere; quanquam nobis multo probabilius videatur, plerumque sensationem molestantem excitando, et forsavi aliquali narcotica, vomitionem ab illis cieri. Sed, utcumque haec sint, satis credo evincimus, vomitui occasionem saepe saepius praebere debilitatem; cum igitur, ut dyspepsiae symptoma, eodem ac anorexiam modo, considerare liceat. Ex hisce, multum, ni fallor, mihi lubenter daretur potestas nauseam quasi generis ejusdem considerandi.

INFLATIO. Ex illustrissimi Pringelii et M'Bride experimentis ingeniosissimis sine dubio constat, omnem vegetabilis animalisque misturam, cum aquae quantitate necessaria suppeditatam, certoque in gradu caloris positam, sua sponte in fermentationem properare. Itaque, quin hujuscemodi aliquid in digestionem accidat, quibus videsimur materiae sunt permutatae, et in partes constituentes redactae, mihi incomprehensibile. Praefertim,

fertim, quippe per masticationem, et in ventriculo remoram, liquoribus sunt commistae; ad quos pertinet, ipsis ad fermentationem non dispositis, ut eam inducerent. Istam inter fermentationem, aëris multitudo in cibariis, statu sub fixo antea latitantis, facile extricatur; elasticitatemque recuperat: Unde oriuntur inflatio illa et flatus, quibus ventriculi imbecillitate laborantes affliguntur. Sed, etiamsi aër hicce ex alimentis oriatur, ex quorum nonnullis producitur multo quam aliis major quantitas; attamen omnibus bene notum, ejusmodi aliquid iis firma valetudine fruentibus per raro accidere, nisi vel ciborum nimia quantitas ingeratur, vel ingurgitentur adhuc fermentescentes liquores, ideoque aëre elasticitate praedito pleni. Ex hoc, a plerisque nunc conceditur, maximam hujus sic extricati aëris partem, in massam alimentarem rursus absorberi, dum sanus remaneat ventriculus; et itaque nulla occurrit inflatio. Ejus vero praesentia ventriculi actionis defectum seu imbecillitatem certissime denotat. Facile enim percipiendum, aëris sic extricati re-absorptionem, magna ex parte, de ejus agitatione, et cum aliis ventriculi contentis, donec iis iterum coagmentandi occasio nascatur, perfecta commixtione pendere. Propterea, ubicunque ad gradum morbosum appareat inflatio, sine dubio, debilioris ventriculi, contentis perfectam commixtionem haud efficientis actionis, signum considerare oportet. Porro cum, ventriculi propter tunicarum debilitatem, compressionem multo minorem patiantur ingesta, aër non solum majori quantitate segregetur, sed etiam plus expandatur, quam ventriculi fortioris hominibus

hominibus necesse est. Ad hujus confirmationem a Dr Whytt observatum, canes, post nervorum octavum par, quo multi ad tubum alimentarem emittuntur rami, ligatum, borborygmis torminibusque magnopere affici. Iste quidem aër, ex reliquis ventriculi contentis effugiens, et in massam coalescens, ad superius ventriculi orificium surgit; et inde facilem non inveniens transitum, cardiae forsan propter constrictionem (etiam si, quantum scio, anatomicis peritissimis sphincteri simile adhuc nihil inventum fuit) tandem molestae huic distentioni, inflationis nomine nobis insignitae, occasionem praebet.

Ab hujusce vero irritatione, plerumque ventriculi actionis inducitur inversio; cardiaeque constrictione haecce motu inverso superata, aër in oesophagum rejicitur; ex quo facile ab ore erumpit. Sic quod sub RUCTUS titulo enumeratur, explicandum.

RUMINATIO quoque, symptoma non infrequens, eodem modo facile explicatur. Nam, inter fermentationem, solidiores cibi partes, aëris propter extricationem, fluidis specificè leviores multo deveniunt: Itaque ad ventriculi orificium attolluntur, et hancce per viam, irritationem propter, motumque ventriculi inde inversum, vicinae istae propelluntur materiae, et ejusdem continuatione in os sursum promoventur. Haec quoque ad actionem ventriculi debiliorem demonstrandam censeo concurrere; non ex ciborum difficili solummodo solutione, sed praecipue signum contentorum imperfectae mixtionis quia praebet: Aliter enim in
massam

massam impellerentur materiae solidiores, quo solutioni data esset occasio; rejectioque impediretur.

CARDIALGIÆ sub titulo diversis auctoribus comprehensi fuerunt omnes ventriculi dolores. Omni vero de hac re controversia in medium relicta, nobis observandum, per cardialgiam tantum, velle molestam quandam, quasi ex acrimonia cardiae applicata, sensationem, qualem persentiscere possumus ex acribus aliis systematis valde sentientibus partibus applicatis, vel quae omnibus pernota nomine Anglicano HEART-BURN. Haec equidem ab acrimonia quavis insolita, orificio ventriculi superiori applicata, originem trahere potest, praesertim ubi paulo sensibilior sit. Plerumque vero acrimonia acida excitatur; ut ex materiae, saporis plane acidii, ructu frequenti evidenter apparet. Quapropter, plerisque ut aciditatis in ventriculo praeternaturalis indicium consideratur. Haec vero, quod ex morbofo ventriculi statu dependeat, patet. Nam, etsi maximae alimentorum portioni natura sit acescens, et quanquam haud parva ciborum, acidae certe naturae, quantitas nobis saepe ingeratur; aciditatem tamen seu in ventriculo molestiam exinde oriri, perrarum est. Et, etiamsi nihil sit communius quam in illorum ventriculis, qui vegetabilibus fere vescuntur, aciditatem invenire; tametsi quaelibet hujus indicia in intestinis reperiri aequae infrequens.

Hinc concludendum liquet, idoneam per fluidorum quibus scatet tubus alimentarius admistionem, et forsitan peculiarem propter acescentis alkalescentisque alimentii mixturam, rursus obduci acidum et evanescere.

Sed

Sed aciditas, ubi occurrit, debiliorem ventriculi actionem mea opinione certe denotat, qua non solum excretoria non tam valide emulgeri, et propterea fluida, ad acidum obducendum necessaria, non in quantitate sufficiente effundi, et forsan vitiata; sed etiam ex languidiore ventriculi actione, diutius in ventriculo detineri ingesta, et idcirco in fermentationis gradum majorem progredi, omnibus palam est. In hujusce illustrationem, plurima adduci queunt exempla, quibus, ex ventriculi schirrositatibus, pyloro vicinis, tam coarctatus redditus fuit transitus, ut nulla ventriculi deorsum evacuatio inde permitti posset: His enim casibus, ingesta tam mirum aciditatis gradum acquirere, ut ab hisce rejectis linteola etiam corrofa fuisse compertum sit. Ex his, ni fallor, plane apparebit, aciditatem ventriculi ab atonia ortum trahere. Simulac enim cibi aliquantulum certum fluiditatis gradum acquisiverit, ventriculo statim in fano permanente, bene novimus per pylorum statim in duodenum detrudi; ubi ex bilis admistione aciditas aboletur, ulteriorque ad fermentationem acidam progressus impediretur.

Nunc de cardialgia, ex acida acrimonia oriente, verba fecimus. Sed, ex alia qualicunque acrimonia, seu cardiae aucta sensilitate, originem ducere potest. In omnibus tamen fere casibus, eam, ut debilioris ventriculi actionis signum, considerare licet, qua, ut haec ad orificium superius evadant, et sic cardiam irritent, datur occasio.

GASTRODYNIA multis equidem difficultatibus circumfusa est; quoniam dolores inter ventriculi diversos,
pathologicis

pathologicis distinctiones satis accurate minime sunt designatae. Non inepte forsan quatuor capitibus comprehendi possunt, vel ut ex inflammatione, inflatione, seu distentione, acrimonia, et spasmo, orientes. Hi revera saepe simul conspirant; si primo tamen separentur illi, quos comitatur pyrexia; postea iste ex distentione oriens, in quo dolor multo est diffusior; et denique cardialgia acrimonia orta; omnes ventriculi alios dolores, ut ex spasmo provenientes, considerari oportet! Hic vero spasmus, ut atoniae saepe occasionem praebet, ita debilitatem et atoniam, ut spasmi causas frequentiores, clarissimo cum Hoffmanno considerare licet. “ Ut adeo perpetua haec sit microcosmica lex, in pathologicis studiose imprimis observanda, quod spasmus relinquat atoniam, et atonia vicissim spasms ingignendis velificetur.”

Nunc ad postremum, considerandum symptoma progrediamur, viz. *ALVUM PLERUMQUE ASTRICTAM*. Tanta, hac in re, occurrit inter eos optima valitudine fruenter, differentia, ut non adeo accurate egestionum tempus determinari posset. Sed, si ullam liceat statuere mensuram, nobis probabile videtur, quod ingesta per anum horis plus minus viginti quatuor excernerentur. Ubi igitur intra viginti quatuor vel triginta sex horarum spatium accidit alvi nulla depositio, tunc alvus dicitur tarda, cui ex uberiore partis tenuioris absorptione plerumque adjungitur astrictio.

Quod ad hujusce causam attinet, etiam si retardationem, magna ex parte, intestini coli propter structuram, oriri concedamus; attamen, ut nobis videtur, cujuslibet

juſſibet inteſtinorum portionis motus illius mox antecedentis actione magnopere innititur; et, ut a motus perſtaltici conditione praecipue dependet foecum excluſio, quo tardior vel debilior ille fit, eo ſegnius haec; quo citatior ille, eo citius haec procedit, et vice verſa. Hinc quare ex ventriculi actione debiliore, contenta per pylorum tardius expellente, et exinde duodeni actionem, de qua perſtalticus omnium inteſtinorum motus ſpecialiter pendet, non rite excitante, quod alvius plerumque ſequatur aſtricta; facile credo percipiendum. Sed et omnibus patet, hanc quoque ex inteſtinorum fibrarum muſcularium atonia, iifdem ex cauſis ac illa ventriculi ortum ducente, originem trahere poſſe.

Haec de ſymptomatis dixiſſe ſufficiat; et etiamſi haec explicandi ratio penitus diverſa multis magis forſan arrideat, facile tamen atonia fere ſemper ut dyspeſſiae cauſa accipienda.

Nunc igitur ad CAUSARUM, quae ad hancce ventriculi atoniam, cui dyspeſſia plerumque innititur, inducendam, conſpirant, enumerationem progrediamur. Cauſas vero, quippe quae magnae ſunt diverſitatis, rite inveſtigandas, aliquo ſub ordine diſponere forſan haud abſonum foret. Hoc igitur efficere conati ſumus ſequenti in

T A B U L A.

T A B U L A.

I. CAUSÆ quae in ipsum ventriculum immediate agunt.

A. SEDATIVA seu NARCOTICA.

- a. Opium.
- b. Liquores spirituos.
- c. Nicotiana.
- d. Thea et coffea.
- e. Acida, praesertim fermentabilia.
- f. Putrida.

B. STIMULANTIA.

- a. Aromata.
- b. Cibus plenior.
- c. Vomitus frequens.
- d. Violens purgatio.

C. TONICA.

- a. Amara, &c.

D. RELAXANTIA.

- a. Liquores calidi.

E. NIMIA VENTRICULI DISTENSIO, ex

- a. Cibariis ingestis,
- b. Aëre extricato.

F. STIMULORUM CONSUETORUM ABSENTIA.

II. CAUSÆ quae vel universum vel systematis alias partes primo afficiunt.

- a. Animi pathemata.
- b. Vita sedentaria.
- c. Mentis vel ad studia vel ad negotia magna applicatio.
- d. Temperies frigida, praecipue humiditate conjuncta.
- e. Venus nimia.
- f. Paturitio frequens.
- g. Dispositio hereditaria, &c. &c.

De hisce singulis, aliquid, ex ordine, ut speciatim proferrem, nunc procedendum; et quantum, ex rerum diversarum in humanum systema, ejusque in se invicem partium, operandi rationis inscientia, in potestate est, quo ad dyspepsiam inducendam conferre possunt, ut modum designarem, conandum.

Imprimis, considerandae veniunt quae in ventriculum ipsum proxime operationem habent; et hae forsitan, ut accuratius dicam, solummodo sunt causae quae dyspepsiae idiopathicae ortum praebent. Potentiora inter, memoratu digna sunt *SEDATIVA* seu *NARCOTICA*, quae in ventriculum, fibras ejus musculares immediate infirmando, agunt.

Huncce in modum, *opii* effectus haud omnino aspernandus; ut plerisque nunc medicis concessum, et illis, qui admodum libere utuntur, saepe expertum; ut Turcis qui magnam quantitatem quotidie ingerunt. Opium revera, sicuti omnia alia narcotica, aliquo potestatis stimulantis seu tonicae gradu potiri videtur; sed utrum ex peculiari aliqua materia conjuncta, an reactione quadam, si ut sic dicam liceat, ab opii vi sedativa inducta proveniat, haud cum certitudine aliquid statuere possum. Effectus tamen sedativi clare apparent, non solum fibrarum quibus proxime applicatur actionem specialiter debilitando, sed etiam totius corporis sensibilitatem et robur diminuendo. Non infrequenter quoque opium, magnis in dosibus adhibitum, et longum per tempus continuatum, et corporis insensibilitatem inducere, et mentis quoque facultates imminuere, medicis compertum.

Liquorum

Liquorum spirituosorum seu fermentatione paratorum usum, vel potius abusum, in ventriculi tono destruendo, validissimas exserere vires, inter medicos fere omnes conceditur. Satis equidem, quotidiana ab experientia, comprobatur hujusce veritas; si enim doctori Cheyne habenda sit fides, ab hisce inter homines latius diffusa fuerat strages, quam a pulvere ipso nitrato. Hi revera, pari ac opium ratione, agere videntur; nam, etsi ab homine non admodum assueto modica copia ingestis major toti corpori concilietur vigor, et menti hilaritas; sedativa tamen haud aspernanda vi potiri videntur; et cum majori in quantitate vel ad ebrietatem assumantur, universi exinde systematis vires maxime debilitantur. Sed ventriculum praecipue affici plane constat, non solum spirituum vi narcotica, verum etiam ex nimia ventriculi distentione, et saepe acescente sive acida liquorum natura. Miserima autem illorum est conditio, qui his quotidie indulgent; fatalis enim necessitas haec repetendi inde oritur. Nam sine his, ut a Cel. Van Swieten observatum, toti tremuli et ad omnia vitae munera inhabiles languent; sicque vel inviti, licet meliora videant probentque, ad haec denuo confugere coguntur.

Similes in ventriculi robur enervando, et dyspepsiam alendo, exserit vires *nicotiana*. Illi enim, qui magna in quantitate vel manducant, vel fumum tubo exhauriunt, appetitu prostrato, indigestione, &c. plerumque laborant. Hi equidem nicotianae effectus, multis, ex magno salivae dispendio, quod usum hisce in modis plerumque sequitur, oriri putabantur; et hoc equidem multum

multum confert. Haud pauca vero adduci queant facta quae, mea opinione, vi sedativa considerationis haud indigna nicotianam potiri, plane monstrant; iidem enim effectus celeberrimo Culleno, aliisque, in iis qui manducant, tabacique fumum tubo exhauriunt, nihilominus salivam solito multo magis minime exspuunt, apparuisse dicuntur. Nec infrequens est, usui non assuetis occurrere anorexiam, nauseam, &c. Saepe quoque videndum in illis, qui tabaci pulverem naribus hauriunt, ex quo nulla oritur salivatio; si hujusce minima, quacunque ex causa, in ventriculum deferatur quantitas, mox cibi appetentiam inde labefactari, et vomitum, &c. cieri.

Ad dyspepsiam quoque inducendam, *theae* usum quotidianum non parum afferre, haud paucis existimatur; et maximo credo non sine jure. Nam, etsi noxios quosdam effectus, in illis robusta valetudine gaudentibus, exinde raro apparere observatum sit; in his tamen, temperie teneriore minusque robusta fruentibus, in ventriculi robur enervando, effectus valde sunt notabiles. Hos equidem in ventriculum et reliquum systema effectus, permultis etiam celeberrimis medicis, ad aquam calidam attribuendos esse videbatur. Sed nonnullis ex experimentis a Percival et Lettsom nuper editis, plane credo apparet, theam vi sedanti gaudere. Ad hoc ulterius probandum, medicis peritissimis, infusionis quantitate caloreque datis, effectus secundum imprægnationem diversos fuisse, aliasque materias in ejus locum substituendo, nulla talia effecta inde consequi, usu compertum. Adsunt quoque multi, qui

thacae

theae infusionis ab unico tantum pocillo, magna anxietate, oppreffione, et moleftia circa praecordia, infignifaepe haud fine manuum tremore, plerumque afficiuntur; et tamen, focietatis gratia, multa aquae calidae pocula, cum faccharo lacteque, ullo fine incommodo ebibunt. Ex huius, celeberrimo cum Whytt, exiftimo, merito confentiendum eft, ventriculi affectionum hodie frequentiam liberiori theae ufui praecipue attribuendam. Ille quidem in illa olim fuit opinione, quae noxia omnia theae effecta ex aqua calida folummodo derivari vult. Sed poftea, experientia fua edoctus, hacce de fententia deceffit. Eadem de *coffee* potu obfervare licet, ut permultis éxemplis comprobandum.

De *Acidorum* effectibus nunc mentio facienda. Nam, etfi plerisque, acidum appetitus naturalis effe caufam, putetur, et etiamfi quandoque ftomachus inde acuat; monft rare tamen non valde difficile foret, acida, fermentabilia praefertim, ventriculi etiamque systematis totius tonum debilitando, non afpernandos edere effectus.

Solae nunc quae hoc fub capite confiderandae remanent caufae, funt *putrida* quae in univerfum fystema vires fuas fedatrices potenter exferunt; et ad appetitum fubvertendum materiae in ventriculo putridae praefentia nihil efficacius.

Proximum caufarum agmen, quae ut ad ventriculi debilitatem inducendam pertinentes, confiderationi feffe offerunt, funt STIMULANTIA. Haec equidem, caute et tempeftive ufurpata, tam longe a dyspepfia producenda abfunt, ut ventriculi tonum roburque magnopere

magnopere adaugeant, et morbo in debellando maximè sint momenti. Sed ex usu liberiore, ventriculi atoniam adaugefcere, etiamque induci, bene compertum.

Hocce sub capite primo enumerantur *aromata*; et his alia condimenta includere licet. Haec omnia systemati, et speciatim ventriculi fibris, stimulum praebent; et, si verbis Gaubianis uti liceat, vim igneam, naturae humanae vix domabilem, habent. Sed, usu ex assiduo, provenire ventriculi enervationem, experientia quotidiana fatis confirmat; quomodo autem ad hanc producendam conferant, nec bene notum, nec explicare in praesentiarum nobis conandum. Quamvis autem fibrarum muscularium exercitatio ad earum tonum roburque adaugendum spectare videatur, certos tamen adesse denique fines, quod ad vires, durationem, et repetitionem, quos, si actio ultra progrediatur, ut molesta debiliorque deveniat, et partium atonia tandem proveniat, necessarium esse, notandum. Hinc, perceptu non valde difficile, assiduum aromatum usum, seu quicquid ventriculi nimiam exercitationem concitat, ad vires ejus debilitandas, notatu haud indignos exserere effectus. Concludere igitur licet, quod *cibus plenior*, seu ingluviei consuetudo, aliquos hujusmodi effectus ederet; nec hoc quotidiana ab experientia confirmatione indiget. Illi enim qui divitiis affluentes largis quotidie fruuntur epulis, nec se ad labores credunt natos esse, perpetuis querelis medicorum aures fatigant, dum volunt vivere sani, et nihil agere.

Frequentem quoque vomitionem hancce ventriculi imbecillitatem adaugere, vel etiam producere, ex experientia

perientia compertum. Emetica equidem hoc in morbo saepe maximae sunt utilitatis; frequens vero repetitio plerumque noxia; salubresque ex his provenientes effectus, pro repetitione, magis magisque caduci fiunt, donec tandem ventriculi vires omnino subvertantur. Haec, sine dubio, ventriculi nimiae exercitationi magnopere attribuenda sunt. Sed ventriculi distentio, quae vomitionem plerumque comitatur, et forsan vis quaedam sedativa, qua potiri emetica fere omnia videntur, symbolam suam conferant. Hocce sub capite enumerata fuit *purgatio violens*, forsan non omnino proprie; cum in ventriculi viribus infringendis effectus, potius evacuatione ex magna, alvique constipatione inde sequente, quam ullo ex stimulo, vel ventriculi exercitatione nimia, a catharticiis proveniente, pendere videantur.

Nec, hujusmodi effectus ex TONICIS remediis, veluti *amaris* longo pro tempore usurpatis, haud infrequenter nasci, silentio praetereundum. Sed, ut morbum ex debilitate seu ventriculi atonia originem trahere, demonstrare antea conati sumus, quod haec inter se opposita multis primo conspectu appareant, haud equidem mirum est. Attamen, res aliquando sic se habere, quibusdam ab exemplis, nuper extra dubium positum fuit. Et, si stimulantium effectus, hisce tonicorum simillimos, consideremus, hujusce probabilitas multo facilius fiet; praecipue cum debilitatem, seu collapsum, quamlibet vis nervosae, qua fibrarum motricium magnopere dependet tonus, nimiam exercitationem, secundum proportionem plerumque subsequi conceditur.

conceditur. Dubia forsan quaedam hic occurrere possunt, an haec aliquo in gradu non pronvenient a vi narcotica, qua, ut multi putant, tonica pleraque potiuntur.

Proxime consideranda sese offerunt RELAXANTIA, veluti *liquorum calidorum* frequens ingurgitatio. Ex experimentis Doctoris Robinson, quam aqua calida, nihil effectus magis relaxantes edere inventum; et sic medici fere omnes hodie opinantur. Celeberrimus tamen Pringelius dicit, se nunquam intelligere potuisse, quo modo, in caloris animalis medio, posita corporis partes, et perpetuo humidae, fluidis majorem suo calorem nequaquam habentibus foveri possint.

Hujusce equidem explicationem ingeniosissimam dedit Professor noster eruditissimus CULLENUS. Systema humanum, dum vita adest, viribus ad calorem generandum aptis suppeditari, omnibus credo satis notum. Haec caloris generatio qua proxime dependeat causa, adhuc inter medicos haud omnino convenit. Utcunque vero haec sit, valde probabile videtur, quod hicce calor, nisi certos inter fines ex portionis ad corpora circumfusa communicatione coerceretur, ad gradum multo majorem eveheretur. Atmosphaerae caloris gradus, qui huic corporum vi generatrici respondet, his in regionibus, circa sexagesimum secundum thermometri Farenheitiani gradum positus esse videtur; et haec coeli temperies nec frigida nec calida plerisque sentitur. Hinc facile percipiendum, quod omnis supra 62 caloris gradus (ad certam usque saltem rationem) talem caloris communicationem impediat, et ex hoc, omnes
caloris

caloris applicati effectus relaxantes vires generatrices exferant.

Praeterea, aquam frigidam potum pro usu nostro a natura designatum videri adjiciendum; et regionum meridionalium incolas, omni methodo, ut potum quam frigidum efficiant, uti, bene scimus. Igitur, ut potus frigidus maximos, ventriculum corroborando, et digestionem expediendo, effectus exferit, sic, e contrario, ut liquores calidi, ventriculi fibras relaxando, effectus notatu haud indignos edant, et ad dyspepsiam inducendam conferant, necesse est.

Altera quoque causa hic notanda est, nempe VENTRICULI NIMIA DISTENTIO, quam morbum saepe alere, et haud raro inducere, satis compertum; ut a Cel. Van. Swiet. observatur in helluonibus, qui, ingenti copia cibi et potus quotidie ingurgitata, ventriculum immaniter distendunt. Tandem toties distractis ventriculi fibris, omne robur perit, et postea tota vita languet ventriculi actio. Haec vero ventriculi distentio ex aëris cum alimentis assumpti expansione, et illa inter digestionem extricata, tam adaugefcit, ut quandoque ventriculus appareat magnopere distensus.

Haec equidem praecipuae sunt causae, quae in ventriculum proxime agendo ad dyspepsiam inducendam conferunt. Sed, priusquam ad alterum caput progrediamur, necessarium duco, de quibusdam quae in ventriculum negative agere dici queant, mentionem facere; qualis CONSUETORUM ABSENTIA STIMULORUM, vel naturalium, vel factitiorum. Hic forsan mentio facienda esset de *alimentis in quantitate seu qualitate de-*
D *ficientibus,*

ficientibus, ut ad morbum producendum pertinentibus; sed hanc cenſeo cauſam eſſe rariffimam. Quibus tamen laute et opipare conſuetudo eſt vivere, quando ad menſas ſine arte paratas deveniunt, ventriculus inde graviffime aegrotat, et cibus maxima non ſine difficultate peragitur. *Saliva* quoque et *liquores gaſtrici* ad ventriculi actionem perneceſſarii ſunt; et, ſi quandoque ſubtrahi ſeu vitiari accidat, ventriculus inde labefactatur. *Bilis* etiam in tubo alimentari praefentia ſeu abſentia in ventriculum inſignes habet effectus; et in *Ictero*, excretio ubi bilis in duodenum impedita eſt, indigeſtionem, aciditatem, aliaque debiliorem ventriculi actionem indicantia ſymptomata, ſequi conſtat.

Alterum cauſarum caput nunc aggrediendum, quae in ventriculum ipſum non proxime agunt, ſed ad totius aliarumve ſyſtematis partium actionem ſeu tonum enervandum conferunt; ex quo ventriculi actio, illam ob ſympathiam quae ventriculum inter reliquumque ſyſtema intercedere videtur, magnopere afficiatur neceſſe eſt. Hoc de cerebro praecipue obſervare licet. Invenitur enim, quodcunque cerebri actionem vel excitationem inſigniter diminuat, ventriculi debilitatem omniaque dyspeſſiae inde orta ſymptomata, ſimul inducendi plerumque edere effectum. Ex his, vires, quas *animi pathemata*, praefertim deprimentia, exferre videntur, explicari haud valde difficiles. Nihil equidem citiores violentioresve in ſyſtemate nervoſo debilitando edit effectus, quam pathemata reprimentia, ut metus, moeſtitia, &c. Sed, ex medicorum conſenſu, hi in ventriculi functionibus perturbatis plerumque
apparent.

apparent. Haecce vero pathemata quomodo exferant vires, nisi cerebri actionem vel excitationem diminuendo, haud mihi in propatulo est.

Proxima notanda venit *vita sedentaria*, qua nihil ad ventriculi vires enervandas potentius agit. De hac nobis observandum est, systematis tonum, magna ex parte, a functionum diversarum actione pendere; et, ut verbis eruditissimis Gaubii utar, Nimia quies et potentias motrices, et quae movendae sunt partes, in torporem conjicit. Sed, prae caeteris, pessime afficiuntur quae in abdomine continentur organa primae digestionis; maxime si etiam prono corpori sedenti comprimentur, atque alimenti quantitas et qualitas non respondeat vitae desidi. Sed, etiamsi vitam sedentariam degentes haud pauci, multis ex rebus, hosce effectus effugiant; eam tamen morbum plerumque producere, vel saltem, causarum ad inducendum concurrentium operationem favere, omnibus patet.

Hi equidem effectus, ab illa *mentis ad negotia seu studia applicatione*, quae vitam sedentariam saepe comitatur, magis ingravescent. Atque ad functiones sustentandas, etsi mentis exercitatio quam necessaria sit, apud medicos tamen convenit, nihil in systemate nervoso enervando, dyspepsiaque inducenda, quam studiis vel negotiis nimis diligenter incumbere, magis noxios edere effectus. Excessus tamen cum varietate studiorum tolerabilior est; at vehemens cogitationum in eandem rem intentio, non interrupta, rari sunt quibus non magnopere noceat.

Quod

Quod ad *frigidae temperiei* effectus attinet, observare licet, morbum hyeme quam aestate plerumque curatu difficiliorem; et saepe curabilem tantum aestatis accessu, vel in clima calidius pro tempore hyemali removendo. Et illos, qui ventriculi imbecillitate quadam laborant, si in frigidum pavimentum aliquo pro tempore nudis pedibus remaneant, cum anorexia et vomitu affici, haud raro invenitur. An frigus vero ad dyspepsiam inducendam, vel systema nervosum in universum debilitando agat, vel vasorum extremorum cuticularium actionem seu tonum enervando, ex quo ventriculi fibrarum atonia sequatur necesse, ulla cum certudine haud dicendum. Effectus tamen frigoris, *humiditatis* accessu, magnopere augefcit; cum a viribus relaxantibus, quod omnia ex atonia orta mala adaugeantur vel inducantur, omnibus apertum. Aër igitur humidus, etsi quod ad frigus modum non superans, eisdem producere potest effectus. Nobis tametsi observandum, nihil ad systema corroborandum, actionemque ventriculi promovendam, aëre frigidiusculo efficacius, dummodo exercitationis fatis simul utatur aegrotans.

Nunc de *nimia venere* verba facienda, in ventriculo debilitando vires exferere validas a Sanctorio dicta. Et, enim summam voluptatem universalis excipit virium resolutio, quae crebro ferri nequit, quin enervet; et, ex sympathya, quae genitalia inter et ventriculum intercedit, atoniam hisce ullo ab excessu inductam, aliquo in gradu, ad ventriculum communicari, plane patet. Cum autem nimia non numero sit, sed natura, ratione aeta-

tis et corporis, feminalium vesicularum statu, scire licet eam non inutilem esse, quam corporis neque languor neque dolor sequitur.

Quod *frequentem parturitionem* spectat; etsi systema foemineum tam apte natura sit fabricatum, ut ex parturitione provenientius malis magnopere resisteret, et etiam si plurimae sint foeminae, quae natos haud paucos pepererunt valetudine inde non multum diminuta; si tamen effectus a graviditate in universum systema, sed speciatim in ventriculum, provenientes, animo habeamus; et si de magna sanguinis quantitate, post puerperium plerumque amissa, cum methodo simul qua mulieres hoc tempore sunt tractatae, multisque aliis rebus, considerationem suscipiamus; nullum oriri potest dubium, quin saepe, systema universum debilitando, effectus haud aspernandos edat frequens parturitio. Sed, in ventriculi functionibus subvertendis, hi praecipue apparent effectus.

Hic forsitan mentionem facere debemus, de certa ventriculi *dispositione hereditaria* ex parentibus transmissa, qua ab hisce supradictis causis facilius afficitur. Sunt quoque multae forsitan aliae causae, quae ad dyspepsiam inducendam symbolam suam conferant. Sed, in praesentia, non bene sunt exploratae, multoque minus explicari possunt.

Praecipuis nunc ad dyspepsiae descriptionem pertinentibus symptomatis explicatis, causisque remotis plenissime consideratis, percipi haud valde difficile videtur, in eandem sententiam haec omnia concurrere. Ex hoc igitur symptomatum consensu, omnibus percep-

tum

tum iri existimo, quam merito hicce morbus, his symptomatibus stipatus, sub *DYSPEPSIÆ* nomine, in nosologia celeberr. *CULLENI* collocatus fuerit. Cujus supra alia, systematis præstantia, et quantum omnibus de medicinae studiosis mereatur, cuivis lectori non potest quin clarissime appareat.

De morbo tamen ullam certam diagnosin tradere, haud omnino facile. Si enim dyspepsiae amplissima subjicienda sit notio, plerique corporis humani morbi ad eam pertinerent. Ciborum enim appetentia et coctio in omnibus fere morbis multo diminutae sunt. Hoc equidem a natura sapientissime curatur; nam, si appetitus consuetus comitaretur, repletio, multaque alia mala, inde consequantur necesse. Sola, quantum scio, ullam distinctionem stabiliendi methodus, est morbum, prout a speciali causa proxima proveniente, considerare. Ita, revera, multis a ventriculi morbis adventitiis, simul separatur, ut a venenis, alimentis ingratis, crapulis fortuitis, &c. ortis; hisce illam ventriculi permanentem debilitatem non omnino producentibus, quam cum morbo, de quo tractando occupamur, nexum adeo strictum, ut separari nequeat, habere existimem.

Pauca de dyspepsiam inter et hypochondriasin diagnosi adjicienda remanent. Si in diversa medicinae systemata inspiciamus, facile videre est, quanta hoc prematur difficultate; a plerisque enim de hisce morbis promiscue tractatur. Hypochondriasin autem, naturae valde diversae, multis rationibus, probabile. Nam plurimi, sive stomachi sive intestinorum morbi, nul-

lum

lum hypochondriae affectionis signum praeferentes, observantur; et vicissim affectiones hypochondriacae, absque sensibili eorundem viscerum passione. Sed, si ulla inter hos morbos diagnosi institui posset, quod tamen a multis pernegatur, optimam credo stabiliendam esse, ex hypochondriasis definitione in Synopsi Culleniana tradita, viz. Dyspepsia cum torpore, languore, metu, et tristitia, in temperamento melancholico. De animi affectionibus vero observandum, quod, etiam si in hypochondriasi hae saepius occurrant, in dyspepsia tamen haud raro quoque appareant. Antea plane mea opinione probatum fuit, ventriculi tonum a cerebri excitationis statu magnopere affici. Sic, si ventriculi ex alia quacunque causa proveniat atonia, quod haec sese vicissim cerebro impertiatur, probabile videtur. In hypochondriasi revera quin multa dyspepsiae symptomata plerumque appareant, haud dubitari potest. Ex ATONIA tamen seu laxitate nequaquam originem trahunt; sed potius ex nimio fibrarum tono, vel rigiditate, et ex ventriculi intestinorumque actione tardiore. Hypochondriasis enim eos fere tantum adurit, quibus corpora rigidiora, solidaque magis tensa, sunt; et qui systematis nervosi torporem, et insensibilitatem, vel denique omnia temperamenti melancholici indicia, nacti fuere.

M E D E N D I R A T I O.

Ex symptomatum causarumque consideratione, ab atonia seu ventriculi debilitate ortum ducere dyspepsiam, extra dubium credo positum. In morbo igitur profligando, omnem ut huic atoniae obviam eatur dirigendam attentionem, dilucide liquet. Hoc perficere conandum,

1. Causis remotis quam maxime evitandis.
2. Certis quae morbum augere inveniuntur symptomatis mitigandis, vel, si possibile, amovendis.
3. Hisce quae vigorem tonumque ventriculi restaurant remediis adhibendis.

Priusquam vero de hisce considerationem suscipiamus, abs re non alienum observare, existimo, quod, in dyspepsiae tractatione, non, ut in plerisque aliis morbis, ob oculos habendae sint species solummodo idiopathicae; nec, nisi injuria, separandae specierum symptomaticarum consideratio. Ex antea dictis, satis clare monstratum, ab diversis systematis partibus ad ventriculum atoniam plerumque communicari, indeque haud raro dyspepsiam induci. Sic, e contrario, concludere licet, non tantum ventriculi atoniam, verum etiam vigorem, ad corporis partes fere omnes propagari posse, et adeo medelam, huic atoniae, ex qua ventriculi illa ortum traxit, praestandam. Et res sic accidere revera inveniemus; haecce enim omnia
fere

fere medicamenta, quae ad systematis universi, vel partium ejus diversarum, tonum vigoremque restaurandum, aliquo modo profunt; qualia cortex Peruvianus, ferrum, &c. fere tantum ventriculi canalisque alimentarii tonum afficiendo, agere possunt.

Nunc vero ad instituta transeundum; et, imprimis, De causis remotis evitandis. Hoc equidem, etsi forsitan magis idonee ut ad prophylaxin pertinens, considerari debet; ad DYSPEPSIÆ tamen curationem, nihil majoris momenti, non in specie sola idiopathica, quae ex iis proxime originem trahit, sed etiam cum aliis ex systematis affectionibus proveniat: Nam dyspepsiae ortui, ab hisce concurrentibus causis, sola quandoque praebetur occasio. Omnes autem a solidorum debilitate provenientes morbi curatu difficillimi, et idonco regimine, potius quam medicamentis, saepe curabiles. Ad hoc animum nisi advertamus, medicina frequenter inefficax. Praecipua vero regiminis pars ex causarum remotarum evitatione constat. De his adeo plene antea disseruimus, ut ulla nunc repetitio omnino supervacanea foret.

De THEA tamen, ut multis potu hocce pergrato abstinere maximae foret difficultatis, observandum, quod multo tutius assumi posset, si ea pauca per momenta coquatur, quo materies illa volatilis, qua praecipue effectus proveniunt noxii, dispergatur. In dissertatione inaugurali, nuper Lugduni Batavorum edita, theam aqua in bulliente macerare, et infusionem paucas post horas effusam, prout res poscit, calefacere, magnis effertur laudibus. A medico etiam e-

gregio Londinensi affirmatum, ullo absque incommodo duplum, hacce methodo, sese ingurgitare posse; quae ut moris est praeparata multas certe molestias induceret. Eodem cum consilio substitui potest theae extracti in aqua bullientè solutio; multum tamen dubito, ne gustus ille perjucundus, quo thea plerisque tam gratissima, hisce methodis depravatus sit.

Quod ad certa quae morbum augescunt symptomata mitiganda spectat; praecipua sunt indigestio, vomitus, aciditas, ventriculi dolores, et alvi constipatio. Haec ex ordine considerata, et imprimis **INDIGESTIO**. Nihil apud medicos communius, quam omnia dyspepsiae symptomata huic indigestioni, vel ventriculi contentis vitiatis, attribuire, jamdudum facta fuit mentio; hujusce vero opinionis instabilitatem demonstrare conati sumus: Et hanc indigestionem, ut signum ventriculi debilitatis, considerari plerumque tantum debere, inde clare patet. Ubicunque vero stomachi adsit impuritas, ut quae aliquid ad ventriculi debilitatem promovendam conferat, et medicamentorum ventriculo vigorem conciliandi gratia adhibitorum operationem impediat; hinc medicorum consuetudo est, medelam ventriculo contenta evacuando aggredi. Effectus tamen, ex emeticis provenientes, multo majores stabilioresque, quam ex ventriculi evacuatione sola, oriri putarem: Atonia enim remanente, eadem mox reveniat impuritas necesse. Sed, emetica, in ventriculo roborando, haud exiguos edere effectus, verisimillimum, non solum ventriculi fibrarum actionem excitando, sed etiam ad corporis superficiem determinacionem

tionem adaugendo, et sic vaforum extremorum tonum restaurando; ex quo ventriculi tonus magnopere afficiatur.

Hocce proposito, quibusdam in usu fuit, quae apud eos vomitio vocatur sicca, fauces irritando, ut ad vomendum solummodo conatus excitarentur, moliri; et haud raro maxima non sine utilitate. Multi tamen laboris est opus, et nobis non sat est experientiae de eo aliquid ulla cum fiducia statuere.

Quod emeticorum electionem spectat, omnino de consilio nostro pendet. Nam, si cum plerisque ventriculi contenta evacuare tantum sit in animo, optime conveniunt emetica mitiora; sicut theae viridis, chamomel. cardui, raphan. rust. &c. infusiones. Sed, si in proposito tonum roborandi, et ad superficiem determinandi, persistere placeat, emetica fortiora, ut ipecac. vitriol. alb. antimon. &c. prorsus necessaria. Quomodo autem se res habeat, emeticorum tam frequens repetitio, quam plerisque mos est, certe nullis nititur rationibus; ut enim ante observatum, morbum potius augescere invenitur. Haec de indigestionis auxilio in praesenti dixisse sufficiat; etsi forsan non sine emolumento adhibere potest lene medicamentum, ut tinct. sac. seu rhei.

VOMITUM symptomata esse inter molestissima quae dyspepsiam comitantur, et haud raro medicorum etiam expertissimorum peritiam fallere, bene notum. Illam equidem ventriculi atoniam, de qua praecipue pendet dyspepsia, emeticorum usu ex frequenti, saepe adaugescere, jamjam probare conati sumus; adeo,
quin

quin hicce aliquos hujusmodi edat effectus, non mihi in propatulo est. Sic vomitus ubi perfrequens vel violentior, (tunc enim solummodo ullam attentionem huic specialiter impendi opus est), vomitorium lene adhiberi debet, ex acri si in ventriculo hospitante materia provenisse suspicari possemus. Maxima tamen cautela in regulae applicatione, **VOMITUS VOMITU CURATUR**, adhibenda. In dyspepsia vero, ad hanc vomitionem sistendam, nil saepe efficacius inventum vini seu spiritus vini Gallici haustu, vel paucis elix. seu spirit. vitrioli guttis; quorum posterius maximae ego ipse vidi utilitatis. In multis quoque casibus, cum omnia alia remedia nulli fuissent usui, opiata effectus exoptatos edidere, vel interne adhibita, vel in ventriculum, cataplasomatis forma, imposita. Nonnunquam vero emplastri epispastici ad epigastrium applicatione penitus profligatur vomitio.

ACIDITATEM ventriculi enervati effectum antea plane demonstravimus; et acida, sed praecipue acefcentia, ad dyspepsiae symptomata adaugenda, aliquid conferre, plerisque in confesso est; a celeberrimo et Hoffmanno observatur, nocere quam maxime tam esculenta, quam potulenta acida, iis qui ventriculum habent infirmum. Hic tamen notandum, ex hisce tantum acidis vel acefcentibus, quae aliquo fermentationis gradui sunt obnoxia, hos provenire effectus, quandam forsan materiam propter, fermentationem inter, extricatam. Etsi enim in universum acida vi quadam sedanti potiri videantur; acidis tamen mineralibus

ralibus quae fermentationem potius impediunt, ventriculi actionem potestas est excitandi.

Ex hoc, ut alimenti vegetabilis maxima portio naturam acescentem habet, cibum animale fere solum commendare generalis apud medicos fuit regula; et haud raro equidem, cum ad magnum ventriculi imbecillitas processerit gradum, et quibusdam ex causis ad fermentationem acidam maxime sit propensus ventriculus, huiusce rei necessitas palum est omnibus. Multis tamen detrimenti non minimi est. Nec scorbuti insignem ad gradum ex hac diaeta inducti exempla defunt; et, quin fluida naturam magis minusve alkalescentem, seu putridam, secundum cibum animale, acquirant, mihi non facile credendum. Ab hac praeterea major nutrimenti suppeditatur quantitas, et plethorae ortui praebetur occasio. Inde vero quanta proveniunt incommoda! Illam hinc cibi animalis commendationem coercendam, et dyspeptics alimenti tantum vegetabilis, quantum sine incommodo ferre potest ventriculus, assumendum, haud parum idoneum existimo.

Hi equidem magnam panis bene fermentati quantitatem assumere debent, qui certum fermentationis gradum subeundo, et ignis actionem patiendo, fermentationis redintegrationi minus sit obnoxius. Atque non solum hic, sed etiam radices et olera parva quantitate, plerumque assumi queant. Lac quoque, etsi ab acescentia non penitus tutum, cibo animali saepenumero cum emolumento substitui potest. Frequenter quoque experientia compertum, ventriculi debilitate laborantibus, per aestatem facilia ferri vegetabilia, etsi, hyberno vel
tempore

tempore verno, maximo non sine incommodo hisce uti potuissent. Hoc profecto illustrationem, ab exemplo a Cel. Culleno relato, medici arthritici cujusdam, patitur; majori apud quem nihil fuit in gratia, quam vini Burdigaliensis (Claret) lagena. Per tempus tamen hybernium, et etiam vernum, ne minimam quidem assumere audebat quantitatem; sed, quam primum Junii initium appropinquabat, libere impuneque hausit. Multi etiam adsunt, qui, cum alvus bene se habeat, vegetabilibus uti possunt, sed cum astricta nequaquam. Quaedam sic tempora adesse, ubi causae remotae magis sedulo quam in aliis evitandae sint, dilucide liquet. Haec idcirco tempora quam studiose aegrotis observanda; et ex his, appetitu, et ventriculi vigore, cibi vegetabilis in usu dirigendi.

Quod potum spectat; observandum, liquores plerisque fermentatos, ut acescentiae sunt obnoxii, et plerumque saccharatae, non bene assimilatae, materiae portionem continent, qua fermentationis renovationi praebeatur occasio, nocere. Omnes fere hinc ex byne confecti liquores evitandi; quibusdam vero cerevisia Londinensis (seu Porter) optime convenit; illa praefertim quae magnae vetustatis, et lupulis bene confecta. De liquoribus vinosis, tenuiora omnia vina fugienda, et illa diu confecta, vel quae penitus sunt fermentata, tantum utenda; ut Madeirense, quod, transmarinum calidiori ex regione veniens, fermentationis gradum sufficientem subivit; quapropter ad fermentationem ineundam minus expositum est. Vel secundum alcoholis in iis contentam quantitatem, cui fermentationi

mentationi resistendi est potestas, eligenda vina. Hinc facile videndum, qua ratione vinum Portugalense vel Madeirense, vetustate edentulum, vino Burdigalensi et plerisque aliis anteponendum.

Hi profecto liquorum fermentatorum in ventriculi aciditate augenda effectus, cur hujusmodi omnes evitarentur, causa fuerunt, et in eorum loco aquae, spirituum parva quantitate commistae, usus substitueretur; quod proposito bene equidem accommodatum, fermentationi quippe non omnino obnoxium, sed potius resistens. Ut antea tamen observatum, in ventriculi tono destruendo, spirituum usu perfrequenti nihil majores exserere vires; sic, in hujusce longum per temporis spatium liquoris usu perseverare, sine dubio evitandum; et ad vini usum, sicut vegetabilium, ubicunque causarum remotarum ex absentia, ventriculique vigore, fieri potest, dyspeptici reducendi.

Nunc, quantum hujus instituti ratio fineret, diaetae, quae in hoc morbo nobis ad aciditatem praeveniendam maxime accommodata videtur, lineas exteriores notavimus. Sed quoque, cum in ventriculo adsit aciditas, hanc mox corrigendi nobis est potestas. Hoc equidem terris absorbentibus, aqua calcis, salibus alkal. sapone, &c. perfici potest.

Prima inter absorbentia, *magnesia*, ex qua cum aciditate in ventriculo hospitante coalita provenit sal medius, alvum leniter fere subducens; dum illi, ex aliis orientes, effectus omnino contrarios edere quibusdam existimantur. Hoffmannus vero peritissimus, de magnesia differens, ait, " Neque tamen praeterire possumus id incommodi

modi nos quandoque ab hoc magnesia pulvere deprehendisse, quod flatulentias et morificationes in imo ventre reliquerit, si frequentius in usum trahatur; primaque regio progignendis corrosivis succis, ut in hypochondriacis fieri solet, exposita sit." Haec tamen contra magnesia usum multum non valent. Magnesia enim acidum in ventriculo hospitans tantum mutat; non omnino morbi tollit causam ex ventriculi atonia originem trahentem, qua alimentis probe concoquendis impar fit. Sed quibusdam in casibus, magnesia, magna in quantitate data, alvum justo crebrius subducendo, ventriculi canalisque intestinalis debilitatem augere potest; et, ut ab experimentis Professoris eruditissimi Doct. BLACK, absque dubio probatur, magnam aëris mephitici quantitatem in magnesia cum acido conjunctione extricari; hoc forsan aliquid conferre potest ad observationem Hoffmannianam explicandam. Nondum adhuc quoque certi sumus, annon sal, ex magnesia et ventriculi acido compositum, vi refrigerante seu sedativa polleat; prout de quibusdam salibus medicis observatur. Haec si ita sint, cautela in hujus remedium usu opus est; nec alienum foret, aromatici cujusdam aliquantulum admiscere, quod leni gratoque stimulo ventriculi vires excitaret.

Aquam calcis haud minimi momenti effectus, non solum aciditatem absorbendo, sed etiam in ventriculo pituitam viscidam liquefaciendo, et ventriculo vires conciliando, edere inventum, ut a Doct. Whytt observatur.

Eodem

Eodem modo, *salium alkalinorum*, praecipue *causticorum*, quae, in nephriticis arthriticisque affectionibus, ventriculi statum emendando, praestantissimos producere effectus nuper observatum, explicanda operatio. Alkali equidem causticum, aërem mephiticum in fibras omnes animales vires narcoticas exferere potentissimas, plerisque, et non injuria forsan, creditum, absorbendo, insignis esse utilitatis putabatur. Hujus tamen aciditati obviam ire adhibiti effectus, aëris ex absorptione provenientes, nihili existimo. Ex conjunctione enim cum acido aeris absorptio impediretur, et quodcumque ab alkali ante absorptum fuerat expelleretur, necesse est. Hoc vero aliis alkalinis anteponendum puto. Illis quippe continetur magna aëris vis, qui ut cum acido inter coalescendum expellatur necesse; et sic, vel ab aliqua aeris extricati vi sedativa, vel a distentione inde proveniente ventriculi imbecillitas adaugeat.

Ad ventriculi aciditatem corrigendam magnopere in usu fuit *sapo*, ex oleo conflatus, cum alkali caustico conjuncto, quod ex oleo, acido occurrente, separatum, salem conficit, quo et oleo forsan alvus leniter plerumque subducitur.

Observatur tamen, ex horum alkalinorum usu, quod in fluidis induci posset acrimonia alkalescens, magna-que morborum cohors inde proveniens. Hujus exemplum pernobile celeberrimo Huxamio memoratur. Etsi vero non negandum, ex eorum usu quotidiano, longumque per tempus continuato, hos provenire posse effectus; ex his tamen, ut aciditati obviam irent, ad-

hibitis, hujusmodi aliquid oriatur, non omnino credendum. Maxima nam ad ventriculi robur restaurandum dirigenda est attentio. Plurima etiam adduci queant exempla, haecce ubi medicamenta longo pro tempore apud calculosos usurpata fuerunt; nihil tamen incommodi eorum ex usu deprehenso. Alkali equidem major quam ad acidum saturandum sufficiat quantitas adhibita in ventriculum, ut stimulus, agere potest. Sed hic, modum non superans, utilis potius fiet.

Nunc ad VENTRICULI DOLORES considerandos procedendum. Hos autem, ut ex acrimonia, inflatione, et spasmo, provenientes, notavimus. Posteriora duo magis forsan proprie ad unicum spasmi caput referri debent. Nam, quomodo nisi spasmi canalisi alimentarii partes diversas afficientibus detentus sit aer, accidere possit inflatio, nobis non facile perceptu. Quod cardiacam ex acida acrimonia plerumque ortum ducentem spectat; ei, hisce remediis, quae jam ut ad aciditatem praeveniendam utilia memorata sunt, subvenitur. Si vero a nimia cardiacae sensibilitate, ex mucis naturalis abrasione orta, proveniat, cum emolumento adhibenda demulcentia et opiata. Sed, ubi ructibus ex nidorosis in errore fuisse acrimoniam alkalescentem seu putridam videatur, omnia, quae ventriculi aciditatem augescunt, quorum pars maxima antea fuit designata, utenda.

Hisce tamen connexa, quomodo nescio, ventriculi motus inversio, contenta contra cardiam impellens, saepe obvenit. Ex hoc intellectu non difficile, quare haec *aromata* seu *stimulantia*, ventriculi actionem excitando,

tando, contentaque deorsum impellendo, medelam crebro praestent. Haud raro etiam, cardialgiam ab iis adaugescere, inventum; quod forsan a volatili quadam materia his emissa, cardiamque irritante, quo ventriculi motus inversio inducitur, provenit. Hôc modo, aromatum in flatu expellendo effectus forsan explicari possunt. Etsi enim aër, saepe, magna quantitate extricatus, superius prope ventriculi orificium innatet, a cardiaequae spasmo seu constrictione illic detineatur, quibus equidem casibus, aromatica, ut antispasmodica, aëris sic inclusi expulsiioni occasionem praebentia, considerari debent; satis tamen notum, in iis optima sanitate ventriculique vigore gaudentibus, quibusdam ex aromaticis semper fere provenire flatus fursum expulsiionem.

In his quoque ventriculi doloribus spasmo ortis, ut **GASTRODYNIA**, aromata frequenter maximae sunt utilitatis. Hinc a plerisque vires exserere antispasmodicas existimabantur. Res tamen magis perspicue explicari potest. Spasmm saepenumero de atonia pendere, ante mentionem fecimus. Debiliior vero ventriculi canalisque alimentarii portionibus particularibus actio contingens, partium superiorum actione adaugenda, eorumque contentis impellendis, solummodo debellanda. Hinc, quare aromaticis, sicut aliis stimulantibus, praestanda sit medela, facile videndum. Hoc, ex parte, proposito, simulque, prout antispasmodica, et maxima revera non sine utilitate, adhibentur alkali volat. moschus, aether vitriol. gummi foetida, &c. Opium equidem praecipuum efficacissimumque remedium. Cautela tamen opus est, ne usu perfrequenti

ti ventriculi atonia, aliaque dyspepsiae symptomata, inde augeantur.

Postremum, de quo aliquid speciatim proferrem oportet, symptoma, est *ALVUS ASTRICTA*. Hanc vero canalisi alimentarii contentorum retentionem ex intestinorum fibrarum muscularium actione debiliore et atonia, vel ex ventriculi atonia ortum primo ducente, vel ex causis ipsis proxime applicatis proveniente, pendere, antea ex dictis fatis clarum existimo.

Atonia profecto haec, quacunque ex causa orta, in ventriculi debilitate augenda vires fortasse vicissim exferet: Et dyspepsiae symptomata alvi constipatione deteriora saepe reddi invenimus. Ut huic igitur obviam eatur, maxima adhiberi debet attentio. Omnis tamen purgatio certe evitanda; quoniam in intestinis debilitandis multum conducere invenitur. Huic consilio, *fructus acescentes*, necnon *manna*, et id genus alia, propter ad fermentationem proclivitatem, minus accommodata videntur.

Sales neutri haud raro ad hocce implendum adhibentur; et, quando parvis saepeque repetitis portionculis alvus leniter subduci potest, cum emolumento forsitan utendi sunt. Hoc vero efficere non omnino facile; vel enim nimios, vel haud sufficientes, plerumque edunt effectus. Nec *acribus ex catharticis*, eodem modo adhibitis, plus sperandum. De *magnesiæ* et *saponis*, ad alvi constipationi obviam eundum, usu, jam ante tractavimus.

Rhabarbarum in huncce finem a plerisque in usum frequenter advocatur; et revera effectibus non
sine

sine praestantissimis. Rhabarbarum autem in ore manducare, succumque lente sorbere, consultissimum videtur. Hoc quippe modo, vix apparent effectus purgantes; ad alvi tamen constipationi occurrendum plerumque sufficit. Ex amaritudine quoque, ad ventriculi robur restaurandum, aliquid collaturum esse, dilucide liquet.

Oleum ricini (remedium in usum nuper vocatum) hoc ad efficiendum satis commode adhiberi potest; parva enim copia alvum leniter tantum ciet, absque tamen ulla purgatione inducta. Adsunt praeterea medicamenta nonnulla, quae in crassa potius, quam tenuia intestina, agere videntur; exinde magnis intestinis contenta solummodo evacuant, etiamque, magna si dosis adhibeatur, vix plus faciunt. Haec inter, enumeranda veniunt, *aloe*, quam vix concoqui posse bene notum, nec non *sulphur*, cujus in ventriculo solutio chymica non facilis equidem explicatio- nis. Post ejus tamen usum, haud raro ructus, odoris vaporis sulphuris in menstruis alkalinis ex solutione proveniente simillimi, observantur. Haec equidem ad alvum constipatam subducendam utilissima, et a plurimis hocce cum proposito adhibentur.

Nunc vero, symptomatis vehementioribus, methodisque haec mitigandi designatis, remediorum ventriculi tono accommodatorum considerationem aggrediamur. Imprimis forsitan haud alienum, in haec, quae in ventriculo ipso roborando proxime agunt, et in illa, quae vel in universum vel alias systematis partes vires exserunt, remedia dividere.

Priorum,

Priorum, quae adhuc commemoranda, (multa enim symptomata diversa percurrere jamjam consideravimus), SALINÆ sunt SUBSTANTIÆ, et AMARA. Sales in universum, ut alkalinos, acidos, et neutrales, (hisce sub postremis, metallicis terreisque comprehensis), considerare licet.

De *Alkalinorum* ad aciditati occurrendum usu mentionem antea fecimus. In ventriculi etiam viribus excitandis, vigoreque adaugendo, effectus non minimos edunt. In praesenti tamen, ex rationibus supra dictis, non multum invalet usus.

Acida, in hoc propositum, haud infrequenter, nec injuria, adhibentur. Haec vero solummodo, fermentationi non omnino obnoxia, usurpanda, facillime apparebit. Hinc, apud medicos fere omnes, in usu sunt acida fossilia. Hodie vero, nihil majori laude floret, quam vitriolica, aromatum portiuncula adjecta, sub elix. vitriol. forma. Haec equidem aromatum additio saepe haud inutilis; et huic medicamenti speciem praebet. Haud paucis vero ita fit ingratum, ut acido simplici, qualis spirit. vitriol. ten. uti necessitemur, cujus 15 vel 20 guttae vehiculo quodam proprio bis terve de die hauriri possint. Acidum nitrosum, quoad cognoscimus, adhuc haud omnino in usum advocatum. Nec muriaticum nunc magnis, ut olim, effertur laudibus. Aderat tamen praeparatio, tinct. aperit. Meibei nomine donata, multumque, vires ob stomachicas, celebrata. Hanc autem, quam salis digestivi solutionem, cum acido praedominante, nihil aliud esse, sine dubio compertum est. Sequenti comparata fuit modo; scilicet
nempe

nempe tartari, seu vegetabile aliud alkali, acido muriat-
tico saturando, exindeque acidi ultra saturationem
copiam addendo ; quod, cum rosarum rubrarum infu-
sione, istam efficacem elegantissimamque edidit tinctu-
ram. Haud necessarium attamen videtur, hanece ut
formulam observaremus ; sal quoniam communis, am-
moniacusve, cum iisdem stipatur effectibus.

Acidum, ex vegetabilibus destillatione adeptum, iis-
dem optime inservit propositis ; cum enim fermenta-
tionis sit incapax, acque tuto et commode ac fossilia
adhiberi queat. Hoc profecto, ut panacea, magno-
pere celebratum fuit, forma sub *picis liquidæ aquæ*,
per Doctorem BERKLEY episcopum Cloynensem, in
usum vocatae. Picem liquidam, oleum esse empyreu-
maticum, ex abiete vel pino destillatione per descensum,
ut lingua alchymistarum utar, obtentum, bene cog-
noscimus. Cum oleo vero descendit liquor acidus
aquosus, cui pleraque debentur aquæ piceæ virtutes.
Huic opinioni magnopere favet, quod picem Norve-
gianam Novæ Anglicanæ prætulit episcopus. Sola
enim inter eas notabilis est differentia, quod ex illa,
quam ex hac, major acidi copia intersit. Liquorem et-
iam acidum, per se, omnes ab aqua picea exspectan-
das vires commodius possidere, medicis a peritissimis
afferitur.

Sales inter neutros pauci, *ammoniaco. communique*
exceptis, magnos in hoc casu edunt effectus. Commu-
nis equidem salis cupidinem nobis natura inferuit, par-
temque in universum alimentorum efficit. Hunc enim
fibras animales potentissime stimulare, commonstrant

Dr Smyth experimenta. Idem de ventriculo dici queat. Tonum enim ventriculi appetitumque adauget, et saepenumero efficacissimus evadit antiemeticus.

Salina nunc memoranda solummodo sunt *metallica*, praecipueque ferro praeparata. Chalybs vi haud aspernanda tonica pollet, qualitate sine ulla, quantum deprehendere possumus, noxia. Hinc praeparationes ejus multifariae. Utram autem aliis praeponere, haud omnino certum. Attamen quoniam pleraque *metallica* in systema, priusquam in statum redactae sint salinum, agere non possunt, in illo statu chalybem tenentes praeparatus anteferendi. Ferrum tamen, ut in aquis mineralibus diffusum, efficacissimum ad systematis tonum restaurandum, nec injuria, habetur; aqua enim frigida ipsa, ad ventriculi fordes eluendas, tonumque augendum, nihil potentius.

Variis in hoc morbo plerumque usitatis salinis jam expositis, ad AMARA nunc pervenimus. De horum operatione difficultates multifarias enodare, nobis non conandum; utut vero sit operandi modus, ea ventriculum corroborare, appetitum acuere, digestionem promovere, extra dubium est. Horum equidem magna adest varietas; qualia radix columb. gentian. cortex Peruvian. fel bovinum inspiss. herbae chamomel. absynth. centaur. min. &c. Quibus, quae pergrati saporis aromatici, una cum amaro, subjungenda, ut cortex aurant. cinnam. &c.

Haec in vino quodam meraciori maceranda; si vero ventriculo acefcant, in aqua bullienti, cui denique aqua quaedam, vel tinct. spirituosa aromatica, addenda;

addenda. Jam ante vero observatum, amara diutius continuata ventriculi robur haud raro ^{laesum} ~~sumere~~ ^{laesum}; quare, ubi haecce remedia in longum temporis spatium, ad medelam obtinendam, continuari debeant, hebdomadam per unam alteramve omittenda; eorumque loco aquis mineralibus uti consultius duco.

Nunc de remediis in universum systema agentibus, quorum praecipuum est *exercitium*; absque cujus ope, omnia alia remedia saepe vana fiunt. Exercitium magnos, ad systema, praecipueque stomachum, firmandum edit effectus. Fluidorum enim circulationem promovet, perspirationem auget, tonum vasorum extremorum cuticularium roborat; strictumque ob nexum ventriculum inter et cutim, robur inde propagari necesse est. Hinc appetitus ille, exercitium plerumque concomitans. Maxima tamen adhibenda cautela, ne huic nimis indulgeatur: Effectus enim exercitii inde omnino fiunt frustranei. Notandum etiam, exercitationem cibum semper antecedere, et ad levem sudorem aut lassitudinem, nunquam ad fatigationem, protrahi debere. Varias inter exercitii species, ambulatio et equitatio optimae videntur: Praecipue haec; eo quod concussionibus iteratis in thoracem et viscera abdominalia speciatim agit.

Quando autem animi adsit depressio, eodem semper itinere non equitandum; sed, ut major obsectorum fiat diversitas et oblectamentum, et in negotio quodam, praeter sanitatem, cujus reminisci semper ingratum, qualia, longum iter, agri gubernatio, semper occupetur necesse est. Pro certoque habeo, levamina, dyspeptici ab aquarum mineralium potu profluentia, itineri confortioque grato, potius quam aquis ipsis, deberi.

Sin autem ab aegrotis haec ferri nequeant, in rheda
vehi,

vehi, asperam praecipue per viam, aut navigare, commodè substituuntur: In observatis enim est, homines meliore frui sanitate navigandum inter, quam alias. Appetitus quoque acuitur, perspiratioque ab alvi astrictione copiosior reddi videtur; cui tamen remediis alvum leniter subducentibus occurrendum. Haud minimi etiam est momenti, in clima calidius peregrinari. Ab ingenuo tamen GREGORIO notatum, vel in frigidius navigare utile esse. Ubi vero, ob aegri debilitatem, nec unum nec alterum admitti queat; corporis praecipue praecordiorum, ex frictionibus cum lanulis aromaticorum vaporibus impraegnatis, felicissimi saepe proveniunt effectus. Indusio lanceo quoque vestiri, per tempus hyemale praecipue, magni est levaminis.

Lavatio frigida nunc solum restat. Antea annotavimus, aciem humani corporis temperiei inferiorem ad systematis sanitatem pernecessarium; exercitumque in aere frigido, quam in calido, ad systema corroborandum efficacius, eo quod perspirationem reddat valentior, bene notum. Ex hisce, balneum quare frigidum, ad systema firmandum, praesertimque ad vasorum cuticularium actionem suscitandam, quod ex calore usum ejus subsequente clare demonstratur, tantum valet, facile equidem perceptu. De ejus vero in stomachum effectibus aliquid ulterius proponere haud necessarium existimo. Illud denique, in omnibus stomachi vitiis praecipuum est, ut, quo modo se quisque aeger refecerit, eodem sanus utatur. Nam redit huic imbecillitas sua, nisi iisdem defendatur secunda valetudo, quibus reddita est.



